

四庫全書

史部

欽定四庫全書

史部

唐律疏義卷十二

五

詳校官侍講學士臣法式善

編修臣程嘉謨覆勘

總校官編修臣王燕緒

校對官編修臣羅修源

謄錄監生臣修廣仁

欽定四庫全書

唐律疏義卷十二

唐 長孫無忌等 撰

戶婚上

凡一十四條

疏義曰戶婚律者漢相蕭何承秦六篇律後加廐興
戶三篇為九章之律迄至後周皆名戶律北齊以婚
事附之名為婚戶律隋開皇以戶在婚前改為戶婚
律既論職司事訖即戶口婚姻故次職制之下

脫戶

諸脫戶者家長徒三年無課役者減二等女戶又減一

二等

謂一戶俱不附貫若不由家長罪其所由即見在沒任者雖脫戶及計口多者各從漏口法

疏義曰率土黔庶皆有籍書若一戶之內盡脫漏不附籍者所由家長合徒三年身及戶內並無課役者減二等徒二年若戶內並無男夫直以女人為戶而脫者又減一二等合杖一百注云謂一戶俱不附貫此文不計人數唯據脫戶縱一身亦為一戶不附即

依脫戶合徒三年縱有百口但一口附戶自外不附止從漏口之法若不由家長謂家長不知脫戶之情罪其所由家長不坐即見在役任者謂身見在官驅使而戶籍無名雖脫戶從漏口法既見在役任即無課調若一身脫戶合杖六十及計口多者從漏口法漏有課口罪止徒三年漏無課口罪止徒一年半脫口及增減年狀謂疾老中以免課役者一口徒一年二口加一等罪止徒三年

謂疾老中
小之類

疏義曰謂脫口及增年入老減年入中小及增狀入疾其從殘疾入廢疾從廢疾入篤疾廢疾雖免課役若入篤疾即得侍人杖云之類罪止徒三年

其增減非免課役及漏無課役口者四口為一口罪止

徒一年半即不滿四口杖六十

部曲奴婢亦同

疏義曰口雖有所增減非免課役者謂增減其年不動課役其漏無課役口者謂身雖是丁見無課役及疾老中小若婦女四口為一口罪止徒一年半漏四

口徒一年十二口徒一年半不滿四口杖六十並謂
無課役者若其戶內漏口或有課役無課役罪名不
等者從併滿之法以課口累不課口科之若課口自
一口至罪止或累併不加重者止從一重課之奴婢
部曲亦同不課之口律稱以免課役課役理不相須
一事得免即從脫漏之法

里正不覺脫漏

諸里正不覺脫漏增減者一口答四十三口加一等過

杖一百十口加一等罪止徒三年

不覺脫戶者聽從漏口法州縣脫戶亦準

此若知情者各同家長法

疏義曰里正之任掌按比戶口收手實造籍書不覺

脫漏戶口者脫謂脫戶漏謂漏口及增減年狀一口

答四十三口加一等過杖一百十口加一等罪止徒

三年里正不覺脫戶者聽從漏口法不限戶內口之

多少皆計口科之州縣脫戶亦準此計口科罪不依

脫戶為法若知脫漏增減之情者總計里內脫漏增

減之口同家長罪法州縣計口罪亦準此其脫漏戶口之中若有知情不知情者亦依併滿之法為罪

州縣不覺脫漏

諸州縣不覺脫漏增減者縣內十口答三十三口加一等過杖一百五十口加一等州隨所管縣多少通計為

罪

通計謂管二縣者二十口答三十管三縣者三十口答三十之類計加亦準此若脫漏增減併在一縣者

得以諸縣通之若止管一縣者減縣罪一等餘條通計準此

各罪止徒三年知情者

各從里正法

不覺脫漏增減無文簿者官長為首有文簿者主典為首佐職以下節級連坐

疏義曰州縣不覺脫漏增減者與上條里正不覺脫漏增減義同十口答三十三口加一等即是二百二十口杖一百過杖一百五十口加一等州隨所管縣多少通計為罪若管二縣以上即須通計謂管二縣者二十口答三十管三縣者三十口答三十之類計加亦準此謂一縣三十口加一等即州管二縣者六十口加一等管三縣者九十口加一等若管十縣三百口加一等若脫漏增減併在一縣謂管三縣一

縣內脫漏三十口州始笞三十若管四縣一縣內脫漏四十口州亦笞三十故云得以諸縣通之若止管一縣者減縣罪一等謂縣脫三十口州得笞二十之類餘條通計準此謂一部律內州管縣監管救折衝府管校尉應通計者得罪亦準此各罪止徒三年知情者各同里正法其州縣知情得罪同里正法里正又同家長之法共前條家長脫漏罪同

注不覺脫漏增減無文簿者官長為首有文簿者主

典為首佐職以下節級連坐

疏義曰不覺脫漏增減無簿帳及不附籍書宣導既是長官事由檢察違失故以長官為首皆同不覺脫漏增減之坐次通判官為第二從判官為第三從典為第四從見有文簿致使脫漏增減者勘檢既由案主即用典為首判官為第二從通判官為第三從長官為第四從其間有知情之官並同家長之罪即從私犯首從科之不知情者自依公坐之法

里正官司妄脫漏

諸里正及官司妄脫漏增減以出入課役一口徒一年
二口加一等賊重入已者以枉法論至死者加役流入
官者坐賊論

疏義曰里正及州縣官司各於所部之內妄為脫漏
戶口或增減年狀以出入課役一口徒一年二口加
一等十五口流三千里若有因脫漏增減取其課調
入已計贓得罪重於脫漏增減口罪者即準贓以枉

法論計贓至死者加役流其贓入官者坐贓論其品
官受贓雖輕以枉法論一疋以上即除名不必要須
贓重衆人之物亦累倍而論之

私入道

諸私入道及度之者杖一百

若由家長
家長當罪

已除貫者徒一

年本貫主司及觀寺三綱知情者與同罪若犯法合出
觀寺經斷不還俗者從私度法即監臨之官私輒度人
者一人杖一百二人加一等

疏義曰私入道謂為道士女冠僧尼等非是官度而私入道及度之者各杖一百注云若由家長家長當罪既罪家長即私入道者不坐已除貫者徒一年及度之者亦徒一年本貫主司謂私入道人所屬州縣官司所住觀寺三綱知情者各與入道人及家長同罪若犯法還俗合出觀寺官人斷訖牒觀寺知仍不還俗者從私度法斷後陳訴須著俗衣仍披法服者從私度法科杖一百即監臨之官不依官法輒度人

者一人杖一百二人加一等罪止流三千里若州縣
官司所度人免課役多者當條雖有罪名所為重者
自從重論並依上條妄增減出入課役科之其官司
私度人被度者知私度情而受度者為從坐若不知
私度情者而受度人無罪

子孫不得別籍

諸祖父母父母在而子孫別籍異財者徒三年

別籍異財不相

須下條

準此

疏義曰稱祖父母父母在則曾高在亦同若子孫別生戶籍財產不同者子孫各徒三年

注云別籍異財不相須或籍別財同或戶同財異者各徒三年故云不相須下條準此謂父母喪中別籍異財亦同此義

若祖父母父母令別籍及以子孫妄繼人後者徒二年子孫不坐

疏義曰若祖父母父母處分令子孫別籍及以子孫

妾繼人後者得徒二年子孫不坐但云別籍不云令其異財令異財者明其無罪

居父母喪生子

諸居父母喪生子及兄弟別籍異財者徒一年

疏義曰居父母喪生子已於名例免所居官章中解訖皆謂在二十七月內而妊娠生子者及兄弟別籍異財各徒一年別籍異財不相須其服內生子事若未發自首亦原

養子捨去

諸養子所養父母無子而捨去者徒二年若自生子及本生無子欲還者聽之

疏義曰依戶令無子者聽養同宗於昭穆相當者既蒙收養而輒捨去徒二年若所養父母自生子及本生父母無子欲還本生者並聽即兩家並皆無子去往亦任其情若養處自生子及雖無子不願留養欲遣還本生者任其所養父母

即養異姓男者徒一年與者笞五十其遺棄小兒年三歲以下雖異姓聽收養即從其姓

疏義曰異姓之男本非族類違法收養故徒一年違法與者得笞五十養女者不坐其小兒年三歲以下本生父母遺棄若不聽收養即性命將絕故雖異姓仍聽收養即從其姓如是父母遺失於後來識認合還本生失兒之家量酬乳哺之直

立嫡違法

諸立嫡違法者徒一年即嫡妻年五十以上無子者得立庶以長不以長者亦如之

疏義曰立嫡者本擬承襲嫡妻之長子為嫡子不依此立是名違法合徒一年即嫡妻年五十以上無子者謂婦人年五十以上不復乳育故許立庶子為嫡皆先立長不立長者亦徒一年故云亦如之依令無嫡子及有罪疾立嫡孫無嫡孫以次立嫡子同母弟無母弟立庶子無庶子立嫡孫同母弟無母弟立庶

孫魯玄以下準此無後者為戶絕

養雜戶為子孫

諸養雜戶男為子孫者徒一年半養女杖一百官戶各加一等與者亦如之

疏義曰雜戶者前代犯罪沒官散配諸司驅使亦附州縣戶貫賦役不同白丁若有百姓養雜戶男為子孫者徒一年半養女者杖一百養官戶者各加一等官戶亦是配隸沒官唯屬諸司州縣無貫與者各與

養者同罪故云亦如之雖會赦皆合改正若當色自相養者同百姓養子之法雜戶養官戶或官戶養雜戶依戶令雜戶官戶皆當色為婚據此即是別色準法不得相養律既不制罪名宜依不應為之法養男從重養女從輕若私家部曲奴婢養雜戶官戶男女者依名例律部曲奴婢有犯本條無正文者各準良人皆同百姓科罪

若養部曲及奴為子孫者杖一百各還正之

無主及主自養者聽

良從

疏義曰良人養部曲及奴為子孫者杖一百各還正之謂養雜戶以下雖會赦皆正之各從本色注云無主謂所養部曲及奴無本主者及主自養謂主養當家部曲及奴為子孫亦各杖一百並聽從良為其經作子孫不可充賤故也若養客女及婢為女者從不應為法笞四十仍準養子法聽從良其有還壓為賤者並同放奴及部曲為良還壓為賤之法

放部曲為良

問答二

諸放部曲為良已給放書而壓為賤者徒二年若壓為部曲及放奴婢為良而壓為賤者各減一等即壓為部曲及放為部曲而壓為賤者又各減一等各還正之

疏義曰依戶令放奴婢為良及部曲客女者並聽之皆由家長給手書長子以下連署仍經本屬申牒除附若放部曲客女為良壓為賤者徒二年若壓為部曲者謂放部曲客女為良還壓為部曲客女及放奴

婢為良還壓為賤各減一等合徒一年半即壓為部曲者謂放奴婢為良壓為部曲客女及放為部曲者謂放奴婢為部曲客女而壓為賤者又各減一等合徒一年仍並改正從其本色故云各還正之此文不言客女者名例律稱部曲者客女同故解同部曲之例

問曰放客女及婢為良却留為妾者合得何罪

答曰妾者娶良人為之據戶令自贖免賤本主不留

為部曲者任其所樂況放客女及婢本主留為妾者依律無罪準自贖免賤者例得留為妾

又問部曲娶良人女為妻夫死服滿之後即合任情去住其有欲去不放或因壓留為妾及更抑配與部曲及奴合得何罪

答曰服滿不放律無正文當不應為重仍即任去若元取當色為婦未是良人留充本色準法無罪若是良人女壓留為妾即是有所威逼從不應得為重科

或抑配與餘部曲同放奴婢為良却壓為部曲合徒
一年如配與奴同與奴娶良人女合徒一年半上籍
為婢者流三千里此等轉嫁為妻及妾兩相情願者
並不合得罪唯本是良者不得願嫁賤人

相冒合戶

諸相冒合戶者徒二年無課役者減二等

謂以疎為親
及有所規避

者主司知情與同罪

疏義曰依賦役令文武職事官三品以上若郡王期

親及同居大功親五品以上及國公同居期親並免課役既為同居有所蠲免相冒合戶故得徒二年無課役者或藉資蔭贖罪事既輕於課役故減二等得徒一年注云謂以疎為親律令所蔭各有等差若以疎相合即失戶數規其資蔭即失課役如斯合戶得此徒刑若蠲免更多或假蔭重者各依本法自從重論主司知情與同罪主司謂里正以上知冒戶情有課役無課役各與同罪

即於法應別立戶而不聽別應合戶而不聽合者主司杖一百

疏義曰應別謂父母終亡服紀已闕兄弟欲別者應合戶謂流離失鄉父子異貫依令合戶而主司不聽者各合杖一百應別應合之類非止此條略舉為例餘並準此

卑幼私輒用財

諸同居卑幼私輒用財者十疋笞十十疋加一等罪止

杖一百即同居應分不均平者計所侵坐贓論減一二等

疏義曰凡是同居之內必有尊長尊長既在子孫無所自專若卑幼不由尊長私輒用當家財物者十足笞十十足加一等罪止杖一百即同居應分謂準令分別而財物不均平者準戶令應分田宅及財物者兄弟均分妻家所得之財不在分限兄弟亡者子承父分違此令文者是為不均平謂兄弟二人均分百

金匱要略卷十二
足之絹一取六十足計所侵十足合杖八十之類是
名坐贓論減一二等

賣口分田

諸賣口分田者一畝笞二十畝加一等罪止杖一百
地還本主財沒不追即應合賣者不用此律

疏義曰口分田謂計口受之非永業及居住園宅輒
賣者禮云田里不鬻謂受之於公不得私自鬻鬻違
者一畝笞十十畝加一等罪止杖一百賣一頃八十

一畝即為罪止地還本主財沒不追即應合賣者謂
永業田家貧賣供葬及口分田賣充宅及碾磑邸店
之類狹鄉樂遷就寬者準令並許賣之其賜田欲賣
者亦不在禁限其五品以上若勳官永業地亦並聽
賣故云不用此律

唐律疏義卷十二

欽定四庫全書

唐律疏義卷十三

唐 長孫無忌等 撰

戶婚中 凡一十八條

占田過限

諸占田過限者一畝笞十十畝加一等過杖六十二十畝加一等罪止徒一年若於寬閒之處者不坐

疏義曰王者制法農田百畝其官人永業準品及老

小寡妻受田各有等級非寬閒之鄉不得限外更占
若占田過限者一畝笞十十畝加一等過杖六十二
十畝加一等一頃五十一畝罪止徒一年又依令受
田悉足者為寬鄉不足者為狹鄉若占於寬閒之處
不坐謂計口受足以外仍有剩田務從墾闢庶盡地
利故所占雖多律不與罪仍須申牒立案不申請而
占者從應言上不言上之罪

盜耕種公私田

諸盜耕種公私田者一畝以下答三十五畝加一等過杖一百十畝加一等罪止徒一年半荒田減一等强者各加一等苗子歸官主

下條苗子準此

疏義曰田地不可移徙所以不同真盜故云盜耕種公私田者一畝以下答三十五畝加一等三十五畝有餘杖一百過杖一百十畝加一等五十五畝有餘罪止徒一年半荒田減一等謂在帳籍之內荒廢未耕種者減熟田罪一等若強耕者各加一等熟田罪

止徒二年荒田罪止徒一年半苗子各歸官主稱苗
子者其子及草並徵還官主下條苗子準此謂妄認
及盜買賣侵奪私田盜耕墓地如此之類所有苗子
各還官主其盜耕人田有荒有熟或竊或強一家之
中罪名不等者並依例以重法併滿輕法為坐若盜
兩家以上之田只從一家而斷併滿不加重者唯從
一重科若親屬相侵得罪各依服紀準親屬盜財物
法應減者節級減科若已上籍即從下條盜買賣之

坐

妄認盜賣公私田

諸妄認公私田若盜貿賣者一畝以下笞五十五畝加一等杖過一百十畝加一等罪止徒二年

疏義曰妄認公私之田稱為已地若私竊貿易或盜賣與人者一畝以下笞五十五畝加一等二十五畝有餘杖一百過杖一百十畝加一等五十五畝有餘罪止徒二年賊盜律云闌圈之屬須絕離常處器

物之屬須移徙其地雖有盜名立法須為定例地既不離常處理與財物有殊故不計贓為罪亦無除免倍贓之例妄認者謂經理已得若未得者準妄認奴婢財物之類未得法科之盜貿易者須易訖盜賣者須賣了依令田無文牒輒賣買者財沒不追苗子及買地之財並入地主

在官侵奪私田

諸在官侵奪私田者一畝以下杖六十三畝加一等過

杖一百五畝加一等罪止徒二年半園圃加一等

疏義曰律稱在官即是居官挾勢侵奪百姓私田者
一畝以下杖六十三畝加一等十二畝有餘杖一百
過杖一百五畝加一等三十二畝有餘罪止徒二年
半園圃謂蒔果實種菜蔬之所而有籬院者以其沃
瘠不類故加一等若侵奪地及園圃罪名不等亦準
併滿之法或將職分官田貿易私家之地科斷之法
一準上條貿易為罪若得私家陪貼財物自依監主

詐欺其官人兩相侵者同百姓例即在官時侵奪賈
易等去官事發科罪並準初犯之時

盜耕人墓田

諸盜耕人墓田杖一百傷墳者徒一年即盜葬他人田
者笞五十墓田加一等仍令移葬若不識盜葬者告里
正移埋不告而移笞三十即無處移埋者聽於地主口
分內埋之

疏義曰墓田廣袤令有制限盜耕不問多少即杖一

百傷墳者謂窀穸之所聚土為墳傷者合徒一年即將尸柩盜葬他人地中者答五十若盜葬他人墓田中者加一等合杖六十如盜葬傷他人墳者亦同盜耕傷墳之罪仍各令移葬若不識盜葬之人告所部里正移埋不告而移慮失屍柩合答三十即無處移埋者謂無閒荒之地可埋聽於地主口分內埋之

郊內旱澇霜雹

問答一

諸部內有旱澇霜雹蟲蝗為害之處主司應言而不言

及妄言者杖七十覆檢不以實者與同罪若致枉有所徵免贓重者坐贓論

疏義曰旱謂亢陽澇謂霖霖霜謂非時降雪雹謂損物為災蟲蝗謂螟螣蝻賊之類依令十分損四以上免租損六免租調損十以上課役俱免若桑麻損盡者各免調其應損免者皆主司合言主司謂里正以上里正須言於縣縣申州州申省多者奏聞其應言而不言及妄言者所由主司杖七十其有充使覆檢

不以實者與同罪亦合杖七十若不以實言上妄有
增減致枉有所徵免者謂應損而徵不應損而免計
所枉徵免贓罪重於杖七十者坐贓論罪止徒三年
既是以贓致罪皆合累倍而斷

問曰有應得損免不與損免以枉徵之物或將入己
或用入官各合何罪

答曰應得損免而妄徵亦準上條妄脫漏增減之罪
入官者坐贓論入私者以枉法論至死者加役流

部内田疇荒蕪

諸部内田疇荒蕪者以十分論一分答三十一分加一

等罪止徒一年

州縣各以長官為首佐職為從

户主犯者亦計所荒蕪

五分論一分答三十一分加一等

疏義曰部内謂州縣及里正所管田稱疇者言田之疇類或云疇地畔也不耕謂之荒不鋤謂之蕪若部内總計準口受田十分之中一分荒蕪者答三十假若管田百頃十頃荒蕪答三十一分加一等謂十頃加

一等九十頃荒蕪者罪止徒一年州縣各以長官為首佐職為從縣以令為首丞尉為從州即刺史為首長史司馬司戶為從里正一身得罪無四等罪名者止依首從為坐其檢勾品官為佐職其主典律無罪名戶主犯者亦計所荒蕪五分論計戶內所受之田假有受田五十畝十畝荒蕪戶主答三十故云一分答三十一分加一等即二十畝答四十三十畝答五十四十畝杖六十五十畝杖七十其受田多者各準

此法為罪

里正授田課農桑

諸里正依令授人田課農桑若應授而不授應還而不
收應課而不課如此事類違法者失一事答四十

一事謂失

一事於一人若於一人失數事
及一事失之於數人皆累為坐

疏義曰依田令戶內永業田課植桑五十根以上榆
棗各十根以上土地不宜者任依鄉法又條應收授
之田每年起十月一日里正預校勘造簿縣令總集

應退應受之人對共給授又條授田先課役後不課役先無後少先貧後富其里正皆須依令造簿通送及課農桑若應合受田而不授應合還公田而不收應合課田農而不課應課植桑棗而不植如此事類違法者每一事有失合答四十

注一事謂失一事於一人若於一人失數事及一事失之於數人皆累為坐

疏義曰一事謂失一事於一人者假若於一戶之上

不課種桑棗為一事合答四十若於一人失數事謂於一人之身應受不授又不課桑棗及田疇荒蕪及一事失之於數人謂應還不收之類在於數人之上皆累而為坐

三事加一等縣失十事答三十二事加一等州隨所管縣多少通計為罪

州縣各以長官為首佐職為從

疏義曰假有里正應課而不課是一事應受而不授是二事應還而不收是三事授田先不課後課是四

事先少後無是五事先富後貧是六事田疇荒蕪是
七事皆累為坐其應累者每三事加一等即失二十
二事徒一年縣失者亦準里正所失十事答三十二
十事加一等一百七十事合徒一年州隨所管縣多
少通計為罪謂管二縣者失二十事答三十失三百
四十事徒一年其管縣多者通計各準此
各罪止徒一年故者各加二等

疏義曰州縣以刺史縣令為首其長官闕者即次官

為首佐職及判戶曹之司為從各罪止徒一年謂州縣長官及里正各罪止徒一年故犯者各加二等即是一事杖六十縣十事笞五十州管二縣者二十事笞五十計加亦準此通計為罪各罪止徒二年其州止管一縣者各減縣罪一等若有故失罪法不等者亦依併滿之法假如授田等失七事合杖六十又有故犯三事亦合杖六十即以故犯三事併為失十事科杖七十其州縣應累併者各準此

應復除不給

諸應受復除而不給不應受而給者徒二年其小徭役者答五十

疏義曰依令人居狹鄉樂遷就寬鄉去本居千里外復三年五百里外復二年三百里外復一年之類應給復除而所司不給不應受而所司妄給者徒二年其小徭役謂充夫及雜使準令應免不免應役不役者合答五十其妄給復除及應給不給準贓重於徒

二年者依上條妄脫漏增減以出入課役一口徒一
年二口加一等贓重入已者以枉法論至死者加役
流入官者坐贓論其不應受復除人而求請主司妄
得復除者依名例若共監主為犯雖造意仍以監主
為主即是所司為首得復者為從若他人為請求妄
得復者自從囑請法

差科賦役違法

諸差科賦役違法及不均平杖六十

疏義曰依令凡差科先富强後貧弱先多丁後少丁
差科賦役違法及不均平謂貧富强弱先後閑要等
差科不均平者各杖六十

若非法而擅賦斂及以法賦斂而擅加益賦重入官者
計所擅坐賦論入私者以枉法論至死者加役流

疏義曰依賦役令每丁租二石調絕絹二丈綿三兩
布輸二丈五尺麻三斤丁役二十日此是每年以法
賦斂皆行公文依數輸納若臨時別差科者自依臨

時處分如有不依此法而擅有所徵斂或雖依格令式而擅加益入官者總計贓至六疋即是重於杖六十皆從坐贓科之假有擅加益入官絹滿一百疋比斂衆人之物法合倍論倍為五十疋坐贓罪止徒三年入私者以枉法論稱入私不必入已但不入官者即為入私官人有祿枉法一尺杖一百一疋加一等十五疋絞無祿者減一等二十疋絞令云至死者加役流並不合絞其間賦斂雖有入官復有入私者即

是罪名不等宜依併滿之法假有擅賦斂得一百足九十足入官十足入私從入官九十足倍為四十五足合徒二年半倍入私十足為五足亦徒二年半不得累徒五年須以入私十足併滿入官九十足為一百足倍為五十足處徒三年

輸課稅物違期

諸部內輸課稅之物違期不充者以十分論一分答四

十一分加一等

州縣皆以長官為首
佐職以下節級連坐

疏義曰輸課稅之物謂租調及庸地租雜稅之類物有頭數輸有期限而違不充者以十分論一分答四十假有當里之內徵百石物十斛不充答四十每十斛加一等全違期不入徒二年州縣各以部內分數不充科罪準此

注州縣皆以長官為首佐職以下節級連坐

疏義曰刺史縣令宣導之首課稅違限責在長官佐職以下節級連坐既以長官為首通判官為第二從

判官為第三從主典及檢勾之官為第四從以勸導之首屬在長官故不同判事差等其里正處百戶之內事在一人既無節級連坐唯得部內不充之罪戶主不充者答四十

疏義曰百姓當戶應輸課稅依期不完即答四十不據分數為坐

許嫁女報婚書

問答一

諸許嫁女已報婚書及有私約

約謂先知夫身老幼疾殘養庶之類而輒

悔者杖六十

男家自悔者不
坐不追聘財

疏義曰許嫁女已報婚書者謂男家致書禮請女氏
答書許訖及有私約注云約謂先知夫身老幼疾殘
養庶之類老幼謂違本約相校倍年者疾殘謂狀當
三疾支體不完養謂非已所生庶謂非嫡子及庶孽
之類以其色目非一故云之類皆謂宿相諳委兩情
具愜私有契約或報婚書如此之流不得輒悔悔者
杖六十婚仍如約若男家自悔者無罪聘財不追

問曰有私約者準文唯言老幼疾殘養庶之類未知
貧富貴賤亦入之類得為妄冒以否

答曰老幼疾殘養庶之類此緣事不可改故須先約
然許為婚且富貴不恒貧賤無定不入之類亦非妄
冒

雖無許婚之書但受聘財亦是

聘財無多少之限酒食
者非以財物為酒食者

亦同
聘財

疏義曰婚禮先以聘財為信故禮云聘則為妻雖無

許婚之書但受聘財亦是注云聘財無多少之限即受一尺以上並不得悔酒食非者為供設親賓便是衆人同費所送雖多不同聘財之限若以財物為酒食者謂送錢財以當酒食不限多少亦同聘財

若更許他人者杖一百已成者徒一年半後娶者知情減一等女追歸前夫前夫不娶還娉財後夫婚如法疏義曰若更許他人者謂依私約報書或受聘財而別許他人者杖一百若已成者徒一年半後娶者知

已許嫁之情而娶者減女家罪一等未成者依下條減已成者五等合杖六十已成徒一年女歸前夫若前夫不娶女氏還聘財後夫婚如法

為婚女家妄冒

諸為婚而女家妄冒者徒一年男家妄冒者加一等未成者依本約已成者離之

疏義曰為婚之法必有行媒男女嫡庶長幼當時理有契約女家違約妄冒者徒一年男家妄冒者加一

等未成者依本約謂依初許婚契約已成者離之違約之中理有多種或以尊卑或以大小之類皆是

有妻更娶

問答一

諸有妻更娶妻者徒一年女家減一等若欺妄而娶者徒一年半女家不坐各離之

疏義曰依禮日見於甲月見於庚象夫婦之義一與之齊中饋斯重故有妻而更娶者合徒一年女家減一等為其知情合杖一百若欺妄而娶謂有妻言無

以其矯詐之故合徒一年半女家既不知情依法不坐仍各離之稱各者謂女氏知有妻無妻皆合離異故云各離之

問曰有婦而更娶婦後娶者雖合離異未離之間其夫內外親戚相犯得同妻法以否

答曰一夫一婦不刊之制有妻更娶本不成妻詳求理法止同凡人之坐

以妻為妾

問答二

諸以妻為妾以婢為妾者徒二年以妾及客女為妻以婢為妾者徒一年半各還正之

疏義曰妻者齊也秦晉為匹妾通賣買等數相懸婢乃賤流本非儔類若以妻為妾以婢為妻違別議法便虧夫婦之正道黷人倫之彛則顛倒冠履紊亂禮經犯此之人即合二年徒罪以妾及客女為妻客女謂部曲之女或有於他處轉得或放婢為之以婢為妾者皆徒一年半各還正之並從本色

問曰或以妻為媵或以媵為妻或以妾作媵或以媵作妾各得何罪

答曰據鬪訟律媵犯妻減妾一等妾減媵加凡人一等餘條媵無文者與妾同即是夫犯媵皆同犯妾所問既非妻妾與媵相犯便無加減之條夫犯媵例依犯妾即以妻為媵罪同以妻為妾若以媵為妻亦同以妾為妻其以媵為妾律令無文宜依不應為重合杖八十以妾為媵令既有制律無罪名止科違令之

罪即因其改換以告身與迴換之人者自從假與人
官法若以妾詐為媵而冒承媵姓名始得告身者依
詐偽律詐增加功狀以求得官者合徒一年

若婢有子及經放為良者聽為妾

疏義曰婢為主所幸因而有子即雖無子經放為良
者聽為妾

問曰婢經放為良聽為妾若用為妻復有何罪

答曰妻者傳家事承祭祀既具六禮取則二儀婢雖

經放為良豈堪承嫡之重律既止聽為妾即是不許為妻不可處以婢為妻之科須從以妾為妻之坐

居父母夫喪嫁娶

諸居父母及夫喪而嫁娶者徒三年妾減三等各離之知而共為婚姻者各減五等不知者不坐

疏義曰父母之喪終身憂戚三年從古自為達禮夫為婦天尚無再醮若居父母及夫之喪謂在二十七月內若男身娶妻而妻女出嫁者各徒三年妾減三

等若男夫居喪娶妾妻女作妾嫁人妾既許以卜姓
為之其情理賤也禮數既別得罪故輕各離之謂服
內嫁娶妻妾並離知而共為婚姻者謂壻父稱婚妻
父稱姻二家相知是服制之內故為婚姻者各減罪
五等得杖一百娶妾者合杖七十不知情不坐
若居期喪而嫁娶者杖一百卑幼減二等妾不坐

疏義曰若居期親之喪嫁娶謂男夫娶婦女嫁作妻
各杖一百卑幼減二等雖是期服亡者是卑幼故減

二等合杖八十妾不坐謂期服內男夫娶妾女婦作妾嫁人並不坐

父母囚禁嫁娶

諸祖父母父母被囚禁而嫁娶者死罪徒一年半流罪

減一等徒罪杖一百

祖父母父母
命者勿論

疏義曰祖父母父母既被囚禁固身圖圈子孫嫁娶名教不容若祖父母父母犯當死罪嫁娶者徒一年半流罪徒一年徒罪杖一百若娶妾及嫁為妾者即

準上文減三等若期親尊長主婚即以主婚為首男女為從若餘親主婚事由主婚主婚為首男女為從事由男女即男女為首主婚為從其男女俱逼或男年十八以下在室之女並主婚獨坐注云祖父母父母命者勿論謂奉祖父母父母命為親故律不加之罪依令不得晏會

居父母喪主婚

諸居父母喪與應嫁娶人主婚杖一百

疏義曰居父母喪與應合嫁娶之人主婚者杖一百
若與不應嫁娶人主婚得罪重於杖一百自從重科
若居夫喪而與應嫁娶人主婚者律雖無文從不應
為重合杖八十其父母喪內為應嫁娶人媒合從不
應為重杖八十夫喪為輕合答四十

唐律疏義卷十三

欽定四庫全書

唐律疏義卷十四

唐 長孫無忌等 撰

戶婚下 凡一十四條

同姓為婚 問答一

諸同姓為婚者各徒二年總麻以上以姦論

疏義曰同宗共姓皆不得為婚違者各徒二年然古者受姓命氏因彰德功邑居官爵事非一緒其有祖

宗遷易年代寔遠流源析本罕能推詳至如魯衛文王之昭凡蔣周公之胤初雖同族後各分封並傳國姓以為宗本若與姬姓為婚者不在禁例其有聲同字別音響不殊男女辨姓豈宜仇匹若陽與楊之類又如近代以來或蒙賜姓譜牒仍在昭穆可知今姓之與本支並不合共為婚媾其有複姓之類一字或同受氏既殊元非禁限若同姓總麻以上為婚者各依雜律姦條科罪

問曰同姓為婚各徒二年未知同姓為妾合得何罪
答曰買妾不知其姓則卜之取決蓍龜本防同姓同
姓之人即嘗同祖為妻為妾亂法不殊戶令云娶妾
仍立婚契即驗妻妾俱名為婚依準禮令得罪無別
若外姻有服屬而尊卑共為婚姻及娶同母異父姊妹
若妻前夫之女者

謂妻所生者餘條
稱前夫之女準此

亦各以姦論

疏義曰外姻有服屬者謂外祖父母舅姨妻之父母
此等若作婚姻者是名尊卑共為婚姻及娶同母異

父姊妹若妻前夫之女者注云謂妻所生者謂前夫之女後夫娶之是妻所生者如其非妻所生自從本法餘條稱前夫之女者準此據雜律姦妻前夫之女亦據妻所生者故云亦準此各以姦論其外姻雖有服非尊卑者為婚不禁

其父母之姑舅兩姨姊妹及姨若堂姨母之姑堂姑已之堂姨及再從堂姨堂外甥女女婿姊妹並不得為婚姻違者各杖一百並離之

疏義曰父母舅姑兩姨姊妹於身無服乃是父母總
麻據身是尊故不合娶及姨又是父母小功尊若堂
姨雖於父母無服亦是尊屬母之姑堂姑並是母之
小功以上尊己之堂姨及再從姨堂外甥女亦謂堂
姊妹所生者女婿姊妹於身雖並無服據理不可為
婚並為尊卑混亂人倫失序違此為婚者各杖一百
自同姓為婚以下雖會赦各離之

為袒免妻嫁娶

諸嘗為袒免親之妻而嫁娶者各杖一百總麻及舅甥妻徒一年小功以上以姦論妾各減二等並離之

疏義曰高祖親兄弟曾祖堂兄弟祖再從兄弟父三從兄弟身四從兄弟三從姪再從姪孫並總麻絕服之外即是袒免既同五代之祖服制尚異他人故嘗為袒免親之妻不合復相嫁娶輒嫁娶者男女各杖一百總麻及舅甥妻謂同姓總麻之妻及為舅妻若外甥妻而更相嫁娶者其夫尊卑有服嫁娶各徒一

年小功以上以姦論小功之親多是本族其外姻小
功者唯有外祖父母若有嫁娶一同姦法若經作袒
免親妾者各杖八十總麻親及舅甥妾各杖九十小
功以上各減姦罪二等故云妾各減二等並離之姦
妾本條減妻一等此條以姦論妾減二等即是娶妾
者累減三等稱以姦論者並依姦法小功之妻若寡
在夫家而嫁娶者各依姦小功以上妻法其被放出
或改適他人即於前夫服義並絕姦者依律止是凡

姦若其嫁娶亦同凡姦之坐又稱妾者據元是袒免
以上親之妾而娶者得減二等若是前人之妻今娶
為妾止依娶妻之罪不得以妾減之如為前人之妾
今娶為妻亦依娶妾之罪

夫喪守志

諸夫喪服除而欲守志非女之祖父母父母而強嫁之
者徒一年期親嫁者減二等各離之女追歸前家娶者
不坐

疏義曰婦人夫喪服除誓心守志惟祖父母父母得奪而嫁之非女之祖父母父母謂大功以下而輒強嫁之者合徒一年期親嫁者謂伯叔父母姑兄弟姊妹及姪而強嫁之者減二等杖九十各離之女追歸前家娶者不坐

娶逃亡婦女

諸娶逃亡婦女為妻妾知情者與同罪至死者減一等離之即無夫會恩免罪者不離

疏義曰婦女犯罪逃亡有人娶為妻妾若知其逃亡而娶流罪以下並與同科唯婦人本犯死罪而娶者流三千里仍離之即逃亡婦女無夫又會恩赦得免罪者不合從離其不知情而娶準律無罪若無夫即聽不離

監臨娶所監臨女

諸監臨之官娶所監臨女為妾者杖一百若為親屬娶者亦如之其在官非監臨者減一等女家不坐

疏義曰監臨之官謂職當臨統案驗者娶所部人女為妾者杖一百為親屬娶者亦合杖一百親屬謂本服緦麻以上親及大功以上婚姻之家既是監臨之官為娶親屬不坐若親屬與監臨官同情強娶或恐喝娶者即以本律首從科之皆以監臨為首娶者為從其在官非監臨者謂在所部任官而職非統攝案驗而娶所部之女及與親屬娶之各減監臨官一等女家並不合坐其職非統攝臨時監主而娶者亦同

仍各離之

即枉法娶人妻妾及女者以姦論加二等

為親屬娶者亦同

行

求者各減二等各離之

疏義曰有事之人若妻若妾而求監臨官司曲法判事娶其妻妾及女者以姦論加二等其娶者有親屬應加罪者各依本法仍加監臨姦罪二等為親屬娶者亦同皆同自娶之坐行求者各減二等其以妻妾及女行求嫁與監臨官司得罪減監臨二等親屬知

行求枉法而娶人妻妾及女者自依本法為從坐仍各離之者謂夫自嫁妻妾及女與枉法官人兩俱離之妻妾及女理不自由故並不坐

和娶人妻

諸和娶人妻及嫁之者各徒二年妾減二等各離之即

夫自嫁者亦同

仍兩離之

疏義曰和娶人妻及嫁之者各徒二年若和嫁娶妾減二等徒一年各離之謂妻妾俱離即夫自嫁者亦

同謂同嫁妻妾之罪二夫各離故云兩離之

尊長與卑幼定婚

諸卑幼在外尊長後為定婚而卑幼自娶妻已成者婚如法未成者從尊長違者杖一百

疏義曰卑幼謂子孫弟姪等在外謂公私行詣之處因自娶妻其尊長後為定婚若卑幼所娶妻已成者婚如法未成者從尊長所定違者杖一百尊長謂祖父母父母及伯叔父母姑兄弟

妻無七出

問答一

諸妻無七出及義絕之狀而出之者徒一年半雖犯七出有三不去而出之者杖一百追還合若犯惡疾及姦者不用此律

疏義曰伉儷之道義期同穴一與之齊終身不改故妻無七出及義絕之狀不合出之七出者依令一無子二淫泆三不事舅姑四口舌五盜竊六妬忌七惡疾義絕謂毆妻之祖父母父母及殺妻外祖父母伯

叔父母兄弟姑姊妹若夫妻祖父母父母外祖父母
伯叔父母兄弟姑姊妹自相殺及妻毆詈夫之祖父
母父母殺傷夫外祖父母伯叔父母兄弟姑姊妹及
與夫之總麻以上親若妻母姦及欲害夫者雖會赦
皆為義絕妻雖未入門亦從此令若無此七出及義
絕之狀輒出之者徒一年半雖犯七出有三不去三不去者謂一
經持舅姑之喪二娶時賤後貴三有所取無所歸而出之者
杖一百並追還合若犯惡疾及姦者不用此律謂惡疾及

姦雖有三不去亦在出限故云不用此律

問曰妻無子者聽出未知幾年無子即合出之

答曰律云妻年五十以上無子聽立庶以長即是四十九以下無子未合出之

義絕離之

問答一

諸犯義絕者離之違者徒一年若夫妻不相安諧而和離者不坐

疏義曰夫妻義合義絕則離違而不離合得一年徒

罪離者既無名字得罪只在一人皆坐不肯離者若兩不願離即以造意為首隨從者為從皆謂官司判為義絕者方得此坐若未經官司處斷不合此科若夫妻不相安諧謂彼此情不相得兩願離者不坐即妻妾擅去者徒二年因而改嫁者加二等

疏義曰婦人從夫無自專之道雖見兄弟送迎尚不踰閭若有心乖唱和意在分離背夫擅行有懷他志妻妾合徒二年因擅去而即改嫁者徒三年故云加

二等室家之敬亦為難久惟薄之內能無忿爭相嗔
鬻去不同此罪

問曰妻妾擅去徒二年因而改嫁者加二等其有父
母期親等主婚若為科斷

答曰下條嫁娶違律祖父母父母主婚者獨坐主婚
若期親尊長主婚者主婚為首男女為從父母知女
擅去理須訓以義方不送夫家違法改嫁獨坐父母
合徒三年其妻妾之身唯得擅去之罪期親主婚自

依首從之法

奴娶良人為妻

諸與奴娶良人女為妻者徒一年半女家減一等離之
其奴自娶者亦如之主知情者杖一百因而上籍為婢
者流三千里

疏義曰人各有耦色類須同良賤既殊何宜配合與
奴娶良人女為妻者徒一年半女家減一等合徒一
年仍離之謂主得徒坐奴不合科其奴自娶者亦得

徒一年半主不知情者無罪主若知情杖一百因而
上籍為婢者流三千里若有為奴娶客女為妻者律
雖無文即須比例科斷名例律稱部曲者客女同鬪
訟律部曲毆良人加凡人一等奴婢又加一等其良
人毆部曲減凡人一等奴婢又減一等即部曲奴婢
相毆傷殺者各依部曲與良人相毆傷殺法注云餘
條良人部曲奴婢私自犯本條無正文者並準此奴
娶良人徒一年半即娶客女減一等合徒一年主知

情者杖九十因而上籍為婢者徒三年其所生男女
依戶令不知情者從良知情者從賤

即妾以奴婢為良人而與良人為夫妻者徒二年

奴婢
自妾

者亦
同各還正之

疏義曰以奴若婢妾作良人嫁娶為良人夫婦者所
妾之罪合徒二年奴婢自妾嫁娶亦徒二年各還正
之稱正之者雖會赦仍改正之若聘財多準罪重於
徒二年者依詐欺計贓科斷

雜戶不得娶良人

諸雜戶不得與良人為婚違者杖一百官戶娶良人女者亦如之良人娶官戶女者加二等

疏義曰雜戶配隸諸司不與良人同類止可當色相娶不合與良人為婚違律為婚杖一百官戶娶良人女者亦如之謂官戶亦隸諸司不屬州縣亦當色婚嫁不得輒娶良人違者亦杖一百良人娶官戶女者加二等合徒一年半官戶私嫁女與良人律無正文

並須依首從例

即奴婢私嫁女與良人為妻妾者準盜論知情娶者與同罪各還正之

疏義曰奴婢既同資財即合由主處分輒將其女私嫁與人須計婢贓準盜論罪五疋徒一年伍疋加一等知情娶者與奴婢罪同不知情者不坐自雜戶與良人為婚以下得罪仍各離而改正其工樂雜戶官戶依令當色為婚若異色相娶者律無罪名並當違

令既乖本色亦合正之太常音聲人依令婚同百姓
其有雜作婚姻者並準良人其部曲奴婢有犯本條
無正文者依律各準良人如與雜戶官戶為婚並同
良人共官戶等為婚之法仍各正之

違律為婚

諸違律為婚雖有媒娉而恐喝娶者加本罪一條強娶
者又加一等被強者止依未成法

疏義曰違律不許為婚其有故為之者是名違律為

婚假如雜戶與良人為婚雖有媒娉而恐喝娶者加本罪一等本坐合杖一百加一等處徒一年強娶者又加一等謂以威若力而強娶之合徒一年半被強者止依未成法下條未成者各減已成五等女家止笞五十之類

即應為婚雖已納聘期要未至而強娶及期要至而女家故違者各杖一百

疏義曰即應為婚謂依律合為婚者雖已納娉財元

契吉日未至而男家強娶及期要已至吉日而女家故違不許者各杖一百得罪依律不合從離

違律為婚離正

諸違律為婚當條稱離之正之者雖會赦猶離之正之定而未成亦是娉財不追女家妄冒者追還

疏義曰違律為婚謂依律不合作婚而故違者當條稱離之謂上條男家妄冒或女家妄冒離之又正之者謂上條奴婢私嫁女與良人仍正之雖會大赦稱

離之者猶離之稱正之者猶正之定而未成亦是假令雜戶與良人為婚已定監臨之官娶所監臨女未成會赦之後亦合離正故云定而未成亦是男家送財已訖雖合離正其財不追若女家妄冒應離正者追財物還男家凡稱離之正之者赦後皆合離正名例律云會赦應改正經責簿帳而不改正各論如本犯律應離之輩即是赦後須離仍不離者律無罪條猶當不應得為從重合杖八十若判離不離自從姦

法

嫁娶違律

諸嫁娶違律祖父母父母主婚者獨坐主婚

本條稱以姦論者各

從本法至死者減一等

疏義曰嫁娶違律謂於此篇內不許為婚祖父母父母主婚者為奉尊者教命故獨坐主婚嫁娶者無罪假令祖父母父母主婚為子孫娶舅甥妻合徒一年唯祖父母父母得罪子孫不坐

注本條稱以姦論者各從本法至死者減一等

疏義曰本條稱以姦論者謂上條總麻以上以姦論
假令父與其子娶子之從母依雜律姦從母者流二
千里强者絞即父亦得流二千里同雜犯其子若自
犯有官者仍除名此名各從本法至死減一等者若
強娶從母為妻或婚寡伯叔母非被出及改嫁者本
條合死今減一等合流三千里

若期親尊長主婚者主婚為首男女為從餘親主婚者

事由主婚主婚為首男女為從事由男女男女為首主
婚為從

疏義曰期親尊長次於父母故主婚為首男女為從
餘親主婚者餘親謂期親卑幼及大功以下主婚即
各以所由為首事由主婚主婚為首男女為從事由
男女男女為首主婚為從雖以首從科之稱以姦論
者男女各從姦法應除名者亦除名

其男女被逼若男年十八以下及在室之女亦主婚獨

坐

疏義曰男女被逼謂主婚以威若力男女理不自由
雖是長男及寡女亦不合得罪若男年十八以下及
在室之女亦主婚獨坐男女勿論

未成者各減已成五等媒人各減首罪二等

疏義曰未成者謂違律為婚當條合得罪定而未成
者減已成五等假有同姓為婚合徒二年未成即杖
八十此是名減五等其媒人猶徒一年未成者杖六

十是名各減首罪二等各準當條輕重依律減之略
舉同姓為例餘皆倣此凡違律為婚稱强者各加本
罪二等稱以姦論有强者止加一等媒人各減姦罪
一等

唐律疏義卷十四

欽定四庫全書

唐律疏義卷十五

唐 長孫無忌等 撰

廐庫

凡二十八條

疏義曰廐庫律者漢制九章創加廐律魏以廐事散入諸太和年名牧產律至正始年復名廐牧律歷北齊後周更無改作隋開皇以庫事附之更名廐庫律廐者鳩聚也馬牛之所聚庫者舍也兵甲

金匱要略卷之十三
財帛之所藏故齊魯謂庫為舍戶事既終廩庫為
次故在戶婚之下

牧畜產課不充

諸牧畜產準所除外死失及課不充者一牧長及牧子
笞三十三加一等過杖一百十加一等罪止徒三年羊

減三等

餘條羊
準此

疏義曰廐牧令諸牧雜畜死耗者每年率一百頭論
駝除七頭騾除六頭馬牛驢殺羊除十白羊除十五

從外蕃新來者馬牛驢殺羊皆聽除二十第二年除
十五駝除十四第二年除十騾除十二第二年除九
白羊除二十五第二年除二十第三年皆與舊同準
率百頭以下除數此是年別所除之數不合更有死
失及課不充者應課者準令牝馬一百疋牝牛驢各
一百頭每年課駒犢各六十騾駒減半馬從外蕃新
來者課駒四十第二年五十第三年同舊課牝駝一
百頭三年內課駒七十白羊一百口每年課羔七十

口殺羊一百口課羔八十口準此欠數者為課不充
除外死失及課不充者一牧長及牧子笞三十三加
一等即是欠二十二合杖一百過杖一百十加一等
計欠七十二罪止徒三年羊減三等欠三以下未有
罪名欠四笞十三口加一等罪止徒一年半注云餘
條羊準此餘條謂養飼不如法之類但餘條論畜罪
名無羊者並減馬三等故云準此

新任不滿一年而有死失者總計一年之內月別應除

多少準折為罪若課不充遊牝之時當其檢校者準數

為罪不當者不坐

遊牝之後而致
損落者坐後人

疏義曰新任不滿一年謂任牧尉牧長牧子未滿期
年而有死失總計一年之內準折為罪謂若驟新從
外蕃來當年聽除十二即是月別得除一頭新任三
月除三頭五月除五頭餘畜一年準當色應除數準
新任月別折除分數亦準此若除外死失皆準上又
得罪若課不充遊牝之時當其檢校者準數為罪準

令牧馬駝牛驢羊牝牡常同羣其牝馬驢每年三月遊牝應收飼者至冬收飼不當遊牝之時課雖不充依律不坐注云遊牝之後而至損落者坐後人謂雖不當遊牝之時檢校於後損落仍得其罪

繫飼死者各加一等失者又加二等牧尉及監各隨所管牧多少通計為罪仍以長官為首佐職為從

餘官有管牧者

亦準此

疏義曰繫飼死者加一等罪謂應牧繫養之者收飼

理不合死故加罪一等雜畜一死笞四十罪止流二
千里失者又加二等以其繫飼不合失落故加二等
稱又者明累加即失一杖六十罪止流三千里繫飼
羊亦各減三等牧尉及監各隨所管牧尉長通計為
罪依令牧馬牛皆百二十為羣駝騾驢各以七十頭
為羣羊六百二十口為羣羣別置牧長一人率十五
長置尉一人其監即不限尉多少通計之義已從戶
婚解訖仍以長官為首佐職為從者為羣牧事重委

在長官死失及課不充以監為首副監及丞簿為從
條言佐職為從明主典無罪注云餘官有管牧者亦
準此其牧有置監管者亦有隸州縣官管者故云餘
官有管牧者亦準此

驗畜產不實

諸驗畜產不以實者一答四十三加一等罪止杖一百
若以故價有增減贓重者計所增減坐贓論入已者以
盜論

疏義曰依廐牧令府內官馬及傳送馬驢每年皆刺
史折衝果毅等檢揀其有老病不堪乘用者府內官
馬更對州官揀定京兆府管內送尚書省揀隨便貨
賣檢揀者並須以實不以實者一笞四十三加一等
罪止杖一百若以檢揀不實之故令價有增減者計
增減之賊重坐賊論謂驗一不實增三疋一尺及減
三疋一尺各笞五十每一疋加一等十疋徒一年十
疋加一等若因此增減之賊將入已者計賊以盜論

仍徵倍贓監主加二等一疋以上除名其中有增減
不平之贓有入已不入已者若一處犯便是一事分
為二罪罪法不等即以重法併滿輕法須將以盜之
贓累於坐贓之上科之其應除免倍贓各盡本法若
驗羊不實減三等其增減贓坐贓及以盜論者並各
依本條不在羊減三等之例

受官羸病畜產

諸受官羸病畜產養療不如法笞三十以故致死者一

笞四十三加一等罪止杖一百

疏義曰依廐牧令官畜在道有羸病不堪前進者留付隨近州縣養飼療救粟草及藥官給而所在官司受之須養療依法有不如法者笞三十以故致死者謂養療不如法而致死者一笞四十三加一等罪止杖一百

乘官畜私物馱

諸應乘官馬牛駝騾驢私馱物不得過十斤違者一斤

笞十十斤加一等罪止杖八十

疏義曰應乘官馬牛駝騾驢者謂因公得乘傳遞或是軍行但因公事而得乘官畜者私馱物不得過十斤十斤之外更著者一斤笞十十斤加一等罪止杖八十

其乘車者不過三十斤違者五斤笞十二十斤加一等罪止徒一年即從軍征討者各加二等

疏義曰應乘官車或載官私之物載限之外私物不

得過三十斤違者五斤笞二十斤加一等罪止徒
一年從軍征討者各加二等馬牛以下車以上各加
常犯二等馬牛駝騾驢七十一斤罪止杖一百車二
百五十斤罪止徒二年

若數人共馱載者各從其限為坐監當主司知而聽者
併計所知同私馱載

疏義曰若數人共馱載者謂乘官畜及車應得私載
物限外謂畜過十斤車過三十斤假有十人同乘官

畜馱私物各十斤其中五人數外各過一斤依律各
笞十三人各過十一斤各笞二十二人各過八兩律
云過一斤笞十今數不滿一斤依律各無罪又有十
人同車載私物各三十斤其中五人數外各過五斤
依律各笞十三人各過二十五斤各笞二十二人各
過二斤八兩依律數不滿各無罪其監當主司知情
者併計前畜總過三十九斤同私馱法科合笞四十
車總過一百五十斤同私載法合杖六十之類若從軍

征討亦依前各加二等其有他人寄物各計一斤以上為罪皆同私馱載法主當車馬及寄物之人得罪各等亦無首從當官司知情準上解若隨身依仗應將行者各在私物斤數之外不在計限

大祀犧牲不如法

諸供大祀犧牲養飼不如法致有瘦損者一杖六十一加一等罪止杖一百以故致死者加一等

疏義曰供大祀犧牲用犢人帝配之即加羊豕其養

牲大祀在滌九旬中祀三旬三祀一旬養飼令肥不
得捶扑違者是不如法致有瘦損者一杖六十一加
一等五不如法罪止杖一百以故致死者加罪一等
一死杖七十五死徒一年其羊豕雖供人帝為配大
祀故得罪與牛皆同職制律中小祀遞減二等餘條
中小祀準此即中祀養牲不如法各減大祀二等小
祀不如法又減中祀二等

乘官畜脊破領穿

諸乘駕官畜產而脊破領穿瘡三寸答二十五寸以上

答五十

謂圍繞
為寸者

疏義曰乘駕官畜產謂牛馬駝騾驢乘騎者脊破駕
用者領穿瘡三寸答二十五寸以上答五十稱以上
者瘡雖更大罪亦不加若是別傷非乘駕所損自從
傷官畜產之罪不當此坐注云謂圍繞為寸者便是
瘡圍三寸徑一寸圍五寸一分徑一寸七分雖或方
圓準此為法但廉隅不定皆以圍繞為寸

若放飼瘦者計十分為坐一分笞二十一分加一等即不滿十者一笞三十一加一等各罪止杖一百

疏義曰若將官畜放飼謂牧監之官及牧子以上令瘦者計十分為坐假令一羣百疋馬十疋瘦為一分合笞二十一分加一等九分並瘦或百疋皆瘦合杖一百即不滿十者一笞三十一加一等謂止放八疋一瘦笞三十八疋並瘦更加七等合杖一百故云各罪止杖一百監及牧尉皆以所管通計為罪餘雜畜

準數得罪皆準此羊減例減三等

官馬不調習

諸官馬乘用不調習者一疋笞二十五疋加一等罪止杖一百

疏義曰依太僕式在牧馬二歲即令調習每一尉配調習馬人十人分為五番上下每年三月一日上四月三十日下又令云殿中省尚乘每配習馭調馬東宮配翼馭調馬至其檢行牧馬之官聽乘官馬即令

調習故官馬乘用不調習者一疋笞二十五疋加一
等即是四十一疋罪止杖一百上臺東宮供御馬不
調習得罪重於此條即從職制律車馬不調習本條
科罪

故殺官私牛馬

諸故殺官私馬牛者徒一年半贓重及殺餘畜產若傷
者計減價準盜論各償所減價價不減者笞三十

見血
跌

即為傷若血不限傷重處
五日内致死者從殺罪

疏義曰官私馬牛為用處重牛為耕稼之本馬即致遠供軍故殺者徒一年半賊重為計賊得罪重於一年半徒假有殺馬直十五疋絹準盜合徒二年此名賊重及殺餘畜產除馬牛之外並為餘畜若傷謂雖不死而有損傷自馬牛及餘畜各計所減價準盜論減價謂畜產直絹十疋殺訖唯直絹兩疋即減八疋價或傷止直九疋是減一疋價殺減八疋償八疋傷減一疋償一疋之類其罪各準盜八疋及一疋而斷

價不減者謂元直絹十疋雖有殺傷評價不減仍直
十疋止得笞三十罪無所賠償注云見血跪跌即為
傷見血不限傷處多少但見血即坐跪跌謂雖不見
血骨節差跌亦即為傷若傷重謂所傷處重五日內
致死者亦從殺罪及償減價

其誤殺傷者不坐但償其減價主自殺馬牛者徒一年
疏義曰誤殺傷者謂目所不見心所不意或非繫放
畜產之所而誤傷殺或欲殺猛獸而殺傷畜產者不

坐但償其減價減價同上解主自殺馬牛徒一年誤殺者不坐

官私畜毀食官私物

諸官私畜產毀食官私之物登時殺傷者各減故殺傷

三等償所減價畜主備所毀

臨時專制亦為主餘條準此

疏義曰畜產不限官私或毀食官私之物者毀謂有所唐突或舐躡之類因其毀食物主登時即殺傷者各減前條故殺傷罪三等若殺馬牛杖九十其傷馬

牛及殺傷餘畜產名計所減價計賊準盜論減三等
如所殺馬牛準所減價當絹十五疋者徒二年上減
三等合杖一百如此計賊得罪重即從重論仍各償
所減價畜主備所毀假有一牛直上絹五疋毀食人
物平直上絹兩疋其物主登時傷殺此牛出賣直絹
三疋計減二疋牛主償所損食絹二疋物主酬所減
牛價絹亦一疋之類注云臨時專制亦為主假如甲
有馬牛借乙乘用有所毀食即乙合當罪仍令備償

餘條準此謂下條大殺傷他人畜產及畜產舐齧人而應標幟羈絆之類雖非正主皆罪在專制之人

其畜產欲舐齧人而殺傷者不坐不償

亦謂登時殺傷者即絕時皆為

故殺傷

疏義曰其畜產有舐齧人者若其欲來舐齧人當即殺傷不坐不償故注云亦謂登時殺傷者其事絕之後然始殺傷者皆依故殺傷之法仍償減價畜主亦依法得罪

殺總麻親馬牛

問答一

諸殺總麻以上親馬牛者與主自殺同殺餘畜者坐贓論罪止杖一百各償其減價

疏義曰總麻以上謂内外有服者相殺馬牛得罪與主自殺同合徒一年殺餘畜者準減價坐贓論罪止杖一百準此律文總麻以上殺畜產者不合得罪若因傷重五日內致死依上條亦同殺法並償所減價問曰誤殺及故傷總麻以上親畜產律無罪名未知

合償減價以否

答曰律云殺總麻以上親馬牛者與主自殺同主傷馬牛及以誤殺律條無罪諸親與主同明各不坐不坐即無備償準例可知況律條無文即非償限馬牛猶故不償餘畜不償可知

犬傷殺畜產

諸犬自殺傷他人畜產者犬主償其減價餘畜自相殺傷者償減價之半即故放令殺傷他人畜產者各以故

殺傷論

疏義曰犬性噬齧或自殺傷他人畜產犬主償其減價以犬能噬齧主須制之為主不制故令償減價餘畜除犬之外皆是自相殺傷者謂牛相舐殺馬相躪死之類假有甲家牛舐殺乙家馬馬本直絹十疋為舐殺估皮肉直絹兩疋即是減八疋絹甲償乙絹四疋是名償減價之半即故放令殺傷他人畜產者或犬性好噬猪羊其牛馬能相舐躪而故放者責其故

放各與故殺傷罪同謂同上條殺官私馬牛者徒一
年半計贓應重若傷及殺餘畜產者計減價準盜論
各償所減價價不減者答三十兩主放畜產而鬪有
殺傷者從不應為重杖八十各償所減價

畜產舐齧齧人

諸畜產及噬犬有舐齧齧人而標幟羈絆不如法若狂
犬不殺者答四十以故殺傷人者以過失論若故放令
殺傷人者減鬪殺傷一等

疏義曰依雜令畜產觔人者截兩角踰人者絆足齧人者截兩耳此為標幟羈絆之法若不如法並狂犬本主不殺之者各笞四十以不施標幟羈絆及狂犬不殺之故致殺傷人者以過失論過失者各依其罪從贖法律無異文總依凡法不限尊貴其贖一也若本應輕者聽從本其故放令殺傷人者謂知犬及雜畜性能觔踰及噬齧而故放者減鬪殺傷一等其犯貴賤尊卑長幼親屬等各依本犯應加減為罪其畜

產殺傷人仍作他物傷人保辜二十日辜內死者減
鬪殺一等辜外及他故死者自依以他物傷人法假
令故放雜畜產觶踰及齧殺子孫於徒一年半上減
一等合徒一年餘親卑幼各依本服於鬪殺傷上減
一等

即被雇療畜產

被情者同
過失法

及無故觸之而被殺傷者畜

主不坐

疏義曰有人被雇療畜產及無故觸人畜產而被殺

傷者畜主不坐被雇本是規財無故謂故自犯觸如
此被殺傷者畜主不坐若被倩療畜產被殺傷依贖
法

監主借官奴畜

諸監臨主守以官奴婢及畜產私自借若借人及借之
者笞五十計庸重者以受所監臨財物論驛驢加一等
疏義曰監臨主守之官以所監主官奴婢及畜產私
自借謂身自借用若轉借他人及借之者或一人一

畜但借即笞五十或借數少而日多或借數多而日少計庸重於借罪者以受所監臨財物論累贓為坐驛驢加一等謂借即得杖六十計庸重以受所監臨財物論加一等其車船碾磑邸店之類有私自借若借人及借之者亦計庸賃各與借奴婢畜產同律雖無文所犯相類職制律監臨之官借所監臨及牛馬駝驢驘車船邸店碾磑各計庸賃以受所監臨財物論計借車船碾磑之類理與借畜產不殊故附此條

準例為坐

即借驛馬及借之者杖一百五日徒一年計庸重者從上法即驛長私借人馬驢者各減一等罪止杖一百疏義曰即私借驛馬及官司借之者各杖一百五日徒一年計庸重者從上法謂計驛馬之庸當上絹八疋合加一等徒一年半即驛長私借人馬驢者減一等準令驛馬驢一給以後死即驛長陪項是故驛長借人驢馬得罪稍輕各減一等謂上文借驛馬驢加

受所監臨財物一等令驛長借人驢馬各減一等與受所監臨財物罪同罪止杖一百

官私畜損食物

諸放官私畜產損食官私物者笞三十賊重者坐賊論失者減二等各償所損若官畜損食官物者坐而不償疏義曰謂放官私畜產損食官私之物損食雖少即笞三十若準賊得二尺一尺合笞四十是名計賊重者坐賊論失者減二等謂非故放因亡逸而損食者

卷十五
減罪二等各償所損既云損食官私之物或損或食
各令畜主備償若官畜損食官物坐而不償公廨畜
產損食當司公廨既不同私物亦坐而不償若損食
餘司公廨並得罪仍備一準上文

庫藏主司搜檢

諸有人從庫藏出防衛主司應搜檢而不搜檢答二十
以故致盜不覺者減盜者罪二等若夜持時不覺盜減
三等

疏義曰從庫藏出依式五品以上皆不合搜檢其應
搜檢而不搜檢者防衛主司笞二十以不搜檢故而
致盜物將出計所盜之贓主司減盜者罪二等若夜
持時謂庫藏之所持更之人不覺人盜物者減盜者
罪三等持時謂當時專持更者假有不覺盜五疋絹
減三等得杖八十之類

主守不覺盜者五疋笞二十十疋加一等過杖一百二
十疋加一等罪止徒二年若守掌不如法以故致盜者

各加一等故縱者各與同罪

疏義曰主守不限有品無品謂親主當庫藏者不覺有人盜物準絹五疋笞二十不滿五疋未合得罪十疋加一等八十五疋杖一百過杖一百二十疋加一等一百四十五疋罪止徒二年若守掌不如法謂防守持更鑰閉封印乖違不如法而致盜者各加一等謂防衛不如法有人從庫藏出又不搜檢致盜不覺上加一等謂止臧盜者一等夜持時不如法不覺盜

亦加一等止減盜者二等主守之司不如法不覺盜亦加一等五疋笞三十罪止徒二年半此是各加一等故縱者各與同罪謂防衛主司並夜持時之人及主守之司故縱盜者並各與盜者同罪稱同罪者不在除免倍贓監主加罪之例

即故縱贓滿五十疋加役流一百疋絞若被強盜者各勿論

疏義曰國家庫藏本委主司若主司知情容盜得罪

重於盜者名例律與同罪者不在加役流之例故於
庫藏條中特生此例故縱贓四十九疋以下與盜者
罪同不合除免滿五十疋加役流除名配流如法一
百疋絞此謂故縱一人之罪若故縱頻盜及衆人盜
者各依累倍之法若被強盜者各勿論謂被威力盜
之非能拒得者勿論

假借官物不還

諸假請官物事訖過十日不還者答三十日加一等

罪止杖一百私服用者加一等

疏義曰假請官物謂有吉凶應給威儀鹵簿或借帳幕輓褥之類事訖十日內皆合還官若過十日不還者笞三十十日加一等停留總過八十日罪止杖一百因而私服用者謂吉凶事過以後別私服用者每加一等過八十日徒一年

若亡失所假者自言所司備償如法不自言者以亡失論

疏義曰假請官物有亡失者若於請物所司自言失者免罪備償如法不自言失被人舉者以亡失論依雜律亡失官物者準盜論減三等又條亡失官私器物各備償故得亡失之罪又備償之

監主貸官物

諸監臨主守以官物私自貸若貸人及貸之者無文記以盜論有文記準盜論

文記謂取抄署之類

立判案減二等

疏義曰監臨主司謂所在之處官物有官司執當者

以此官物私自貸若將貸人及貸之者此三事無文記以盜論有文記準盜論文記謂取抄署之類謂雖無文案或有名簿或取抄及署領之類皆同無文記以盜論者與真盜同若監臨主守自貸亦加凡盜二等有文記者準盜論並五疋徒一年五疋加一等立判案減二等謂五疋杖九十之類

即充公解及用公解物若出付市易而私用者各減一

等坐之

雖貸亦同餘條公解準此即主守私貸無文記者依盜法

疏義曰即充公解謂以官物迴充公解及私用公解之物無文記有文記立判案若官物從庫藏積聚之中出付人將市易其市易人私用者各準前官物應坐之罪皆減一等坐之稱私用者雖貸亦同餘條公解準此謂一部律內但稱公解私用及貸皆準此減盜罪坐之即主守私貸無文記者依盜法即與真盜同加常盜二等徵倍贓有官者除名故云依盜法

所貸之人不能備償者徵判署之官

下條私借亦準此

疏義曰監臨主守以官物貸人所貸之人不能備償
謂無物可徵者徵判署之官判案者為判官署案者
為主典及監事之類注云下條私借亦準此謂下條
監臨主守之官以官物借人若所借人不能備償亦
徵判署之官故云準此

監主以官物借人

諸監臨主守之官以官物私自借若借人及借之者答
五十過十日坐贓論減二等

疏義曰監臨主守之官以所監臨主守之物謂衣服
襪褥帷帳器玩之類但是官物私自借若將借人及
借之者各笞五十過十日計所借之物準坐贓論減
二等罪止徒二年

損敗倉庫積聚物

諸倉庫及積聚財物安置不如法若曝涼不以時致有
損敗者計所損敗坐贓論州縣以長官為首監署等亦
準此

疏義曰倉謂貯粟麥之屬庫謂貯器仗綿絹之類積聚謂貯柴草雜物之所皆須高燥之處安置其應曝涼之物又須曝涼以時若安置不如法曝涼不以時而致損敗者計所損敗多少坐贓論州縣以長官為首以下節級為從監署等有所損壞亦長官為首以次為從故云亦準此

財物應入官私

諸財物應入官私而不入不應入官私而入者坐贓論

疏義曰凡是公私論競割斷財物應入官乃入私應入私乃入官應入甲而入乙應入私而入公解各計所不應入而入坐贓論

放散官物

諸放散官物者坐贓論

謂出用官物有所市作及供祠祀宴會剩多之類

物在

還官已散用者勿徵

謂營造剩多為物在祀畢食訖為散用

疏義曰放散官物謂出用官物有所市作並謂官物還充官用者假有營造屋宅及供祠祀宴會料度剩

多各計所剩坐贓論若物在未用各準所剩還官若祠祀禮畢宴會食盡及營造事訖皆勿徵

應輸課稅

諸應輸課稅及入官之物而迴避詐匿不輸或巧偽濕惡者計所闕准盜論主司知情與同罪不知情減四等疏義曰應輸課稅謂租調地稅之類及應入官之物而迴避詐匿假作逗留遂致廢闕及巧偽濕惡欺妄官司皆總計所闕入官物數准盜科罪依法陪填主

司知其迴避詐匿巧偽濕惡知情而許行者各與同罪不知情者減罪四等縣官應連坐者亦節級科之州官不覺各遞減縣官罪一等州縣綱典不覺各同本司下從科罪若州縣發遣依法而綱典在路或至輸納之所事有欺妄者州縣無罪

監臨官僦運租稅

諸監臨主守之官皆不得於所部僦運租稅課物違者計所利坐贓論其在官非監臨減一等主司知情各減

一等

疏義曰凡是課稅之物監臨主守皆不得於所部內
僦勾客運其有違者計所利坐贓論除人畜糧外並
為利物在官非監臨減一等謂從坐贓減一等主司
知情者各減一等謂知監臨僦運坐贓止減一等若
非監臨僦運坐贓上減二等所利之錢一非彼此俱
罪二非乞索之贓既用功程而得不合沒官還主

輸給給受留難

諸有所輸及出給而受給之官無故留難不受不給者
一日答五十三日加一等罪止徒一年門司留難者亦
準此若請輸後至主司不依次第先給先受者答四十
疏義曰有應輸官之物及官物應出給與人而受物
出給之官無故留難不受不給者一日答五十三日
加一等罪止徒一年而受給門司留難者亦準受給
官司之法故云亦準此若請輸後至官司不依次第
先受給及請輸前至後給受者答四十

官物有印封

諸官物有印封不請所由官司而主典擅開者杖六十
疏義曰但是官物有封閉印記欲開者皆請所由官
司其主典不請官司而擅開者杖六十

輸課物齎財市糴

諸應輸課物而輒齎財貨詣所輸處市糴充者杖一百
將領主司知情與同罪

疏義曰應輸送課物者皆須從出課物之所運送輸

納之處若輒齎財貨詣所輸處市糴充者杖一百將領主司若知齎物於送納之所市糴情與輸人同罪縱一人糴輸亦同此罪

出納官物有違

諸出納官物給受有違者計所欠剩坐贓論

違謂重受輕出及當

出陳而出新應受上物而受下物之類

疏義曰監主官物或受或給而有違法者謂稱量之物出納須平若重受輕出即有餘剩及當出陳而出

新應受上物而受下物此即為欠須計欠剩之價準
坐贓科罪其有輕受重出及應出新而出陳應受上
物而受中物得罪與上文並同故云之類

其物未應出給而出給者罪亦如之官物還充官用而
違者笞四十其主司知有欠剩不言者坐贓論減二等
疏義曰其物未應出給者依令應給祿者春秋二時
分給未至給時而給者亦依前坐贓科罪若給官物
還充官用有違者笞四十其主司知有欠剩而不舉

言者計所欠剩坐贓論減二等

官物應入私

諸官物當應入私已出庫藏而未付給若私物當供官
用已送在官及應供官人之物雖不供官用而守掌在
官者皆為官物之例

疏義曰謂官物應將給賜及借貸官人及百姓已出
庫藏仍貯在官而未付給之間若私物借充官用及
應徵課稅之類已送在官貯掌或公廨物及官人月

俸應供官人之物雖不供官用而守掌在官並檢驗
贓賄或兩競財物如此之類但守掌在官者皆為官
物之例



唐律疏義卷十五